

BR1M 2.0 dilaksana Februari
Utusan Online
01 Januari, 2013
Oleh SOFIAN BAHAROM

KUALA LUMPUR 31 Dis. - Kerajaan akan melaksanakan pembayaran Bantuan Rakyat 1Malaysia (BR1M) 2.0 bermula Februari ini.

Menteri Kewangan II, Datuk Seri Ahmad Husni Hanadzlah berkata, sehingga hari ini, sebanyak 2,684,916 permohonan baru untuk BR1M 2.0 diterima yang merangkumi 1,823,039 individu bujang dan 861,877 keluarga.

"Bagi ketua isi rumah yang tercicir daripada senarai penerima BR1M yang lepas atau mereka yang tidak pernah memohon, kerajaan memberi peluang kepada mereka untuk membuat permohonan baru.

"Kerajaan menggalakkan lebih ramai individu bujang memohon untuk mendapatkan BR1M 2.0. Pendaftaran bantuan ini akan terus dibuka sehingga satu tarikh yang akan diumumkan kelak," katanya dalam kenyataan akhbar di sini hari ini.

Perdana Menteri, Datuk Seri Najib Tun Razak yang juga Menteri Kewangan dalam pembentangan Bajet 2013 memaklumkan di bawah projek BR1M 2.0, isi rumah berpendapatan bulanan RM3,000 ke bawah layak menerima bantuan sebanyak RM500.

Bantuan itu kali ini turut dipanjangkan kepada individu bujang berusia 21 tahun ke atas yang berpendapatan tidak melebihi RM2,000 sebulan dan mereka layak menerima bantuan sebanyak RM250.

Jelas Ahmad Husni, BR1M 2.0 dijangka dapat memberi manfaat kepada seramai 4.3 juta isi rumah dan 2.7 juta individu bujang melalui peruntukan sebanyak RM3.0 bilion dalam Bajet 2013.

"Seramai 4.2 juta penerima telah mendapat manfaat daripada BR1M yang lalu dengan jumlah peruntukan disalurkan sebanyak RM2.1 bilion," ujarnya.

Hakcipta Terpelihara © UTUSAN MELAYU (M) BERHAD

Source: http://www.utusan.com.my/utusan/Dalam_Negeri/20130101/dn_09/BR1M-20-dilaksana-Februari